

**Wrkapm A Pol Nira Eng Tu
Pilipai**
**Nikgwalpm a tu Pilipai pa kai or
wris nampokgen Pol pa atom kil
atopen paipm**

(Klapm 1-4)

¹ Kupm Pol nampokgen Timoti, mentekg melnum akwapel a orngwatneikgen Krai Sis, mentekg uk wor kipm wrong kin a kipman wriwen wor a Krai Sis a rka kai anong Pilipai. Kupm nira wrkapm kil eng kipm, nampokgen kipm melnum a itna ep iggalen kwap a Maur Wailen, wa kipm melnum akwapel a angklin tu melnum.

² Kupm oklala naki Maur Wailen, Yan amentepmen, nampokgen Wailen Sis Krai, eng mpa tuwegk plantepm ipma wor alntuwekgen ik ngklinsepm a lkepm ipma meen wor.

Pol uk wor Maur Wailen

³ Akangklei wang a kupm akwonalmpentepm pa, kupm uk wor Maur Wailen akupmen.

⁴ Akangklei wang a kupm oklala naki naki Maur Wailen eng angklin kipm kimeket pa, kupm atopen oklala nakel nakel pa.

⁵ Kupm uk wor Maur Wailen atnen a kipm antiwopm akwap wris a laron yangkipm wor a

la Krai pa, ep ilmpiwen a kipm ukipma Maur Wailen ai, kulngkul, kul wli wang ti.

⁶ Kolpa ti kupm ariwe ise la la, Maur Wailen kil alkil a pikekg ngkaten kwap wor ak kawor ipma akipmen pa, kil alkil ikgam ikwap kolpa kawor ipma akipmen pa iye kaingkai, kai iro yiprokg ik wang a Sisas Krai kil yaper nar.

⁷ Kipm pa kol nol walpm akupmen, ti wor wrisen eng kupm akwonalmpentepm kolpa. Kupm ari kipm pa alupm nkgwalpm wor wor a Maur Wailen plantepm irir kol nkgwalpm wor wor a kil uk kul kupm ti. Atom kipm angklin-sopm ak wang a kupm rpma wan tipmning ti, wa ak wang a kupm pikekg atn ak titnongketel yangkipm wor a la Krai pa itna minsrang talpulng yangkipm a tu alilakelopm pa.

⁸ Maur Wailen kil ariwe la, kil kupm la aklale wrisen: nkgwalpm wail akupm pa arkentepm rka, kol nkgwalpm a Sisas Krai kil alkil arkentepm rka pa.

⁹ Kupm oklala naki Maur Wailen eng mpa kil ngklin kipm pa, eng mpa kipm rkul nkgwalpm a plan ipma wor wasrongen tita iye or pa kai wail, eng mpa ariwe akipmen ti mpa wa inip iye kaino watin, a kai wail, wa nkgwalpm akipmen ti mpa wa umpen wontrakole wor, eng mpa kipm ntiwe ik ri la kuina ur a i wor, a kuina ur a i paipm.

¹⁰ Wa kupm wa oklala naki Maur Wailen pa eng mpa kipm ntiwe tukwei kuina ur a wor wrisen ai, eng mpa kipm rpmi wriwen wor kolti, eng ake antiwe mpa melnum ur rkiwepm la kipm

melnum a antokg paipm pa, kolpa iye kaingkai ngko wang a Kraiss kil yaper nar.

¹¹ Kipm kutnun nkgwalpm wor wor kolpa pa, pa kipm kolen yo a Sisas Kraiss kil alkil ikgalen, atom angko ok arke waillet wor pa, eng mpa tu wrongkwail ri pa, pa tu uk wor ik ngkit nang a Maur Wailen.

Pol kil rpma wan tipmining, pake pa ak angklin kwap a Kraiss

¹² Kupm la kipm melnum alkupm a mentepm ukipma Kraiss, kipm mpa riwe la, kalkuten a palngtopm kil pati, ampur kipm ipma kalkut la pa ak angkeng kwap a laron yangkipm wor a la Kraiss pa, kalpis. Pa palng eng ak titnongketel kwap pa.

¹³ Kolpa ti tu melnum wantengkawang a rka wan wail a melnum tukgunakg, a atnen wanyun tatu ti, a tu tiur yela wai, tu ariwe la kupm rpma wan tipmning ti atnen kupm melnum a akwap a Kraiss.

¹⁴ Wa tu melnum waillet alntuwen a mentepm ukipma Kraiss a itna kil pa, tu ari titnongket a Maur Wailen angklinsopm rpma wan tipmning kil, atom pa ak titnongketel tu pa. Atom tu ake wa ngkark, tu itna wrongen laron yangkipm a Maur Wailen kolpa aye kai.

¹⁵ Am aklale pake, tu tiur pa ipma paipm la no itni klangkil kupm ti, atom tu laron nang a Kraiss pa. Pake tu tiur pa nkgwalpm wor atom laron nang a kil pa ak ipma wor.

¹⁶ Tu plan ipma wor atnen a tu wasrongen-topm. Eng ntei, tu ariwe la Maur Wailen kil

alkopm kwap eng la itni tulpulng yangkipm ok a tu a la paipmel yangkipm wor a la Krai pa, atom kupm planten la pa yangkipm aklale wrisen.

¹⁷ Tu a laron nang a Krai ak ipma paipm ti pa, tu akwonalmpen tu alntu ti kolti la uwi nang wailen angen kupm ti. Nikgwalpm a tu pa rka raimpe, tu akwonalmpen la tu a wa lkopm kalkuten tiur ik iken kalkuten a kupm arki rpma wan tipmning ti.

¹⁸ Ti mpa ntei! Pa wor wrisen eng ya watipmen itna eng tu laron nang a Krai. Kol tu laron ik ipma kansil aki ik ipma aklale aki, kupm ti atopen kolti eng tu laron nang akil kolpa kai pake. Kupm atopen kolpa aye kai.

Pol kil la kil ake la imo pa, kil la rpmi eng ngklin tu Pilipai

¹⁹ Kupm atopen atnen kupm ariwe la kipm ok-lala naki naki Maur Wailen pa eng angklinsopm. A wa kupm ariwe la Maur Wor a Sisas Krai pa wa angklinsopm yat. Kolpa ti ikgake kalkuten ti lok ngkliwopm pa, kupm ikga angen pa.

²⁰ Pikekg ep ak ai pa kupm pikekg itna wrongen laron nang a Krai pa kulngkul ak wang ti. Ti wa nikgwalpm wail akupmen pa, kupm am wa nikgwalpm arkekgen la wa itni wrongen uk num alkupmen ti kai ikirmpen Krai, la kupm imo aki, kupm rpmi aki, pa ak ngkat nang a Krai pake. Eng kupm ikgake la uwi numpaipm itni wulmpa a kil pa.

²¹ Kol kupm ake amo, kupm rpmi kanokg ti i i pa, kupm la ik ngkit nang a Krai pa kolpa kai

pake. Pake kol kupm imo pa, pa wa wor wrisen angen pa.

²² Pake kol kupm ake amo, kupm rpmi ti i pa, kwap a kupm aken pa ikga ngko ok rke waillet kolpa iye kai. Kolpa ti kupm ake ariwe la a i wor, kupm imo aki kupm rpmi ti.

²³ Nikgwalpm akupm ti pa rka wekg wekg rka ti: nkgwalpm ur pa kupm wasrongen paipm la imo utnuurng kanokg ti kaino nti Kraiss pa rpmi, pa kol a wor wrisen or kaingkai ai.

²⁴ Ari wa kupm akwonalmpen la kol a kupm rpmi ti i ikwap kolpa iye kai pa, pa wor eng la kol a ngklin kipm pake.

²⁵ Kupm ariwe la kwap wail itna kol a kupm rpmi eng ik pake. Kolpa atom kupm ariwe la kupm ikgake imo, kupm ikga rpmi. Kupm ikga nti kipm wrongkwail rpmi eng ngklinsepm, eng kipm ukipma Maur Wailen ti itni titnongket kolpa iye kai, eng mpa kipm itopen rpmi.

²⁶ Ti kipm ikga ri kupm ikga wa yaper kaintepm pa, kipm ikga ngkit nang a Kraiss Sisas pa itopen-topm wail manten paipm.

Maur Wailen uk wor tu Pilipai la tu rki kalkuten

²⁷ Kwei ur wail wris ur kol a kipm kutnun pa pati kil: kipm mpa itn a rpmi kutnun yangkipm wor kol a Kraiss kil la la kipm alkilen kutnun pa! Kol kupm kai riwepm aki, kol kupm rpmi kil itning aki, kupm la itning tu lakiti la kipm alupm nkgwalpm wris akwap or wris itna titnongket

talpulng wrongmanto, eng mpa tu wrong kin kipman ukipma yangkipm wor a la Krais pa.

²⁸ Wa kupm la wa itning la, kipm ake ngkark eng wrongmanto alkipm pa, kalpis. Kipm itna wrongen kolpa, pa kla ur a Maur Wailen elngtitna la ik plan tu wrongmanto la, tu pa ikga kai paipm pake, a wa ik plan kipm pa la kipm pa ikga Maur Wailen ik uwiyeqm pake.

²⁹ Eng ntei, Maur Wailen kil alkeqm kwap la kipm ukipma Krais pa. A ake wa la kipm ukipma ti kolti pa. A wa kil wa alkeqm kwap la kipm rki kalkuten pa yat itnen a kipm ukipma Krais ti.

³⁰ Kolpa atom ari kipm arki kaikuten wris kol pikekg kipm ari a kupm antiweqm rpma kai pa atom kupm arki pa. Wa wang ti kipm wa atning a kupm arki kaikuten kolpa itna ti.

2

Mentepm mpa lupm nikgwalpm wris ik ngklin tita

¹ Ak wang a ake kipm titnongket pa, Krais pa ak titnongketeleqm pake? Kil plan ipma wor wasrongentepm, kolpa atom kil ak num karkitiweqm pake? Maur Wor kil pa awiyepm aye kai wris, kolpa atom kipm nikgwalpm wor arein tita alok angkli tita pake?

² Ti kupm tilpeqm la, kipm lupm nikgwalpm wris, kipm kimeket rkul nikgwalpm a plan ipma wor wasrongen tita, a wa kipm or wris ore tita. Kipm ik kolpa pipa, kupm mpa itopen wail manten paipm.

³ Ampur kipm akwonalmpen kipm alkipm ti kolti, atom kipm antokg kweikwei pa, la kipm la uwi nang wailen angen tu tiur ai, kolpa iyai. Kipm rku kipm alkipm ti iye nar orngwatneikgen mla ur ai, a kipm ngkit nang a tu pa la tu pa wor pake.

⁴ Kipm itningkri kuina ur a tu tiur ai wasrongen ai, atom kipm ngklin tu ai ep ep pen. Ampur kipm akwonalmpen kipm alkipm pa la ngklin kipm alkipm ti kolti pa.

Krais kil arku kil alkil atom Maur Wailen kil ngkat nang a kil

⁵ Nikgwalpm a kipm pa, mpa kipm lupm nikkwalpm kol a Krais Sisas kil alkil pake:

⁶ Krais kil alkil am irir kolen Maur Wailen pake, ari wa kil ake wa la rkul nang wailen alkil pa itni pa i.

⁷ Kil atnuurng nang wailen alkil a irir kolen Maur Wailen pa. Wa kil awi wor eng kil palng kolen melnum a aken kwap orngwatneikgen mring ur kolti. Kil pikekg man rakuwel palng melnum kol mentepm ti. Tu melnum ariwel pa, tu la kil pa melnum kol mentepm tike.

⁸ Kil arku kil alkil pa atning nungkulkg orngwatneikgen Maur Wailen. Kil atning nungkulkg kolpa kaingkai, kai amo, tu karkurngkel rka yo okgmangki pa amo kolen la pa melnum paipm ur.

⁹ Kil arku kil alkil kolpa atom Maur Wailen awiyel aye kaino alkel nang wailen a itna ep angen nang wailen wrongkwail.

¹⁰ Maur, a mring maur, a melnum, a kweikwei wrongkwail a itna kaino kitnong ai, a itna yela kanokg a ti, a rka kinar kanokg wunen ai, tu ikga elng nar kipor kilko ileinsel, a orngwatneikgen kil wris ita.

¹¹ Ikg a tu yela laron nang a Sisas Kraisi ti la, kil pa Melnum Wailen a itna ep, atom ik ngkit nang a Maur Wailen, Yan Wailen ai.

Wakg a ak alen tu wrong kin a kipman

¹² Kolpa ti kipm workganen yekyek alkupm, akangklei kipm atning nungkulkg ak wang a pikekg kupm antiwepm rpma pa. Pake wail manten pa pati, kipm itning nungkulkg ik wang ti a kupm ake antiwepm rpma. Kolpa ti kipm mpa ngkirk numnantiwepm itni wulmpa a Maur Wailen pa, ikwap timplowis kolpa iye kai eng kil am pikekg angklin ak awiyepm ise.

¹³ Pa atnen Maur Wailen kil alkil pa kil yiprokgen, atom kil antokg kipm atopen eng atning nungkulkg, wa alkepm titnongket pa, atom kipm akwap katnun nkgwalpm wasrongen a kil alkil wris ata.

¹⁴ Kweikwei wrongkwail la ntokg pa pati, ampur kipm la tintangen tita ok yangkipmen pa, iyai.

¹⁵⁻¹⁶ Eng ake mpa melnum ur lawepm la, kipm pa melnum a antokg paipmpaipm pa kalpis.

2:9 2:9 Kwap 2:33; Epe 1:20-21; Ipr 1:3-4 **2:10 2:10** Rom 14:11

2:11 2:11 Rom 10:9 **2:15-16 2:15-16** Tani 12:3; Pil 1:10; 1 Te

Kipm rpmi rukis wriwen wor kolen warim wor a Maur Wailen. Kipm rpma kanokg miningket a tu melnum a antokg paipmpaipm arke, atom atnuurng ya ute, a wa angkom or ya raimpe pa. Kipm iye yangkipm klalen a Maur Wailen pa laron ik ngklin tu pa eng tu itning kutnun pa, ikga tu rpmi wor yongkyong. Kipm pa kolen wakg a akalen ya eng tu pa angkom ore. Kol kipm ik kutnun iye kolpa kai pa, kupm ikga itopentepm paipm tipra ik wang a Krai kil yaper nar pa. Pa ak plan la kwap wail a pikekg kupm ak eng ak angklin kipm pa, ake kupm ak kalpmlal pa.

¹⁷ Pikekg kipm ukipma Maur Wailen kolen kipm al wor uk kipm alkipm kai eng Maur Wailen. Kol tu ntokg la ilmpopm ur pipa, kupm atopen. Kol walmpopm akupm ti ungkwan eng ik kuluk kipm a kipm al wor uk kipm alkipm ti kai eng Maur Wailen ti pa, kupm ikga wa itopen nimpokgentepm yat.*

¹⁸ Kolpa ti kipm am wa kolpa yat pake. Kipm itopen nimpokgentopm yat o, kol a kupm atopen ti!

Pol la ukwa Timoti la kai ri tu Pilipai

¹⁹ Kupm akwonalmpen la, wasrongen a Wailen Sisas ti pipa, kupm la ukwa Timoti ti penterngen kai itn riwepm itningkiriwepm la kipm rka kolai. Plalng pipa, wa lakiti nikopm la kipm rka wor pipa, ipma a kupm pa mpa rki kukula wor om.

* **2:17 2:17** Tu Suta la lap wlikgok ti il wor uk Maur Wailen pa, tu mpa lung u wain pa ik raro wlikgok pa ep, plalng pipa, tu lap (Rom 15:16; 2 Ti 4:6). **2:18 2:18** Pil 3:1; 4:4

²⁰ Ake kupm ari melnum ur a i a alupm nirkwalpm irir kol kupm ti pa kalpis. Kupm ari kol Timoti wris ata kolti kil nirkwalpm arkentepm aklale la ngklinsepm pa.

²¹ Ari kolen wrongkwail ti nirkwalpm arkekgen akwonalmpen kuina ur a tu alntu ti kolti. Ake tu nirkwalpm arkekgen kwap a Sisas Kraiss ti.

²² Pake kimp am ariwe Timoti pa, kil melnum wor a itna titnongket arki kaikuten. Kil am pikekg kimpilp atn anti kupm ti kolen warim pake. Kil angklinsopm eng mentekg akwap angkli yangkipm wor a la Kraiss.

²³ Ti kupm wasrongen la ikga ukwa Timoti kil alkil pa kai riwepm pake. Ari kupm la itni nungkwangen yangkipm alkupmen kil pen, la tu ntokg yangkipm akupmen kil kai kolai plalng pipa, kupm ukwawel kai om.

²⁴ Ti kupm alkupm ti pa, kupm ariwe la Wailen ikga ngklinsopm pa, ti kupm rpma nungkwangen la kupm igam kutnuntel kai riwepm pake.

Pol la ukwa Epaprotitus la kai ri tu Pilipai

²⁵ Kupm wa akwonalmpen yat la ikga ukwa Epaprotitus ti wa yaper kaintepm. Melnum yek pa pikekg kimp ukwawel kul kol melnum yangkipm kuin akipmen, atom kil angklinsopm eng kwap lakip wrongkwail. Kil pa kolen paipmen alkupmen, kil pikekg antiwopm akwap wris. Mentekg yatnenen pikekg arki kalkuten eng talpulng tu a la paipmel yangkipm a Maur Wailen pa.

²⁶ Pikekg tu ur lanakepm la kil ti numpet paipm, atom kipm ipma kalkut eng kil. Kil atning pa, atom kil nkgwalpm arkentepm pilpilen atnen la kil la kol a kai riwepm, ti kupm la ukwawel kai pake.

²⁷ Ei, aklale, kil am pikekg awi numpet wail la kol a imo pake. Ari am pikekg Maur Wailen kil alkil pa akimek areinsel atom angklinsel, ti kil palng wor rpma pa. Ake kil arein kil wris pa, wa kil wa arein kupm ti yat, kolpa eng ake mpa wa iye kalkuten ur pa wa iye kul ik rkuwopm iken kaikuten a kupm arki kil pa.

²⁸ Kolpa ti kupm wasrongen paipm la kupm a ukwawel kaintepm pake. Ik wang a kil kai palngtepm pipa, kipm itopentel o! Kolpa eng ikga ntokg ipma akupmen ti wa rki kukulawen ketnketn.

²⁹ Kipm lkel wor itopentel kol a kil melnum ur almentepmen a ukipma Wailen. Kipm ikglen tu melnum a kolpa kolen melnum yelen alkipmen,

³⁰ eng melnum yek pikekg uk num alkil ti kai akwap a Krai, awi numpet wail la kol a imo ikirmpen kwap a kil pake. Kil ari la kipm pa rpma ya watinet, ake antiwe mpa kipm kul ngklinsopm, kolpa atom kil ti awi wrik a kipm pa kul angklinsopm pake.

3

Mentepm ukipma Krai pa mentepm palng wriwen wor itna wulmpa a Maur Wailen pa

¹ Yangkipm a wet kupm la ep pa, kai eng a plalng pake. Kipm melnum alkupm a mentepm

ukipma Wailen, kipm a Wailen pa ti kipm rpmi itopen kolpa iye kai o! Kupm ake wa kai karken num lpmaakopm eng la, wa la ntiur yangkipm a wuten kupm nirantepm ep pa. Pa wor eng la kipm itning orwrikel kolpa kai eng la ik ngklin kipm pa, eng ikga kipm kai wor pake.

² Tu tiur pa la, kol ake kipm angket num a tu kipman pa katnun ya a men Suta pa, kipm ake warim a Maur Wailen pa. Tu pa tu melnum a angket num alntu ti ayengkalel ari paipm. Tu pa tu melnum akwapel paipm kolen nimpa wrongen a nam kamel pa. Ti kipm mpa ngkom nilokgen ukikg riwe tu melnum a kolpa!

³ Eng ntei, kol mentepm ngket num a mentepm kipman atom mentepm lala, mentepm am palng ute wor itna wulmpa a Maur Wailen ise, pake ake kolpa. Mentepm awi Maur Wor atom mentepm kapor kilko alein Maur Wailen, a mentepm atopen ngkat nang a Krais Sisas eng kwap a pikekg kil akto pa pati, pa kol la mentepm angket num aklale pake. Mentepm ariwe la kuina ur a mentepm melnum ti antokg kai num a melnum ti, wa kweikwei wrongkwail a mentepm melnum ti antokg pa, pa ake antiwe antokg melnum ti palng ute wor itna wulmpa a Maur Wailen pa, kalpis.

⁴ Kol kupm ngkit nang a kupm alkupm ti eng kuina ur pa, kupm antiwe. Eng ntei, kol kupm ti wa lakiti yipuk a yiprokg akupmen ti pa, pa waillet paipm, pake pa ake antiwe antokg kupm ti palng ute wor itna wulmpa a Maur Wailen pa, kalpis. Kol mla ur kil ikwonilmpen la kil antiwe ngkat

nang a kil alkil pa, mpa wa kil riwe yat la, kupm antiwe wa ngkit nang akupmen ti angen kil pa yat.

⁵ Pake kol kupm la lakiti yipuk a yiprokg alkupmen pa pati kolkil: kupm pikekg man rakuwopm, rpma wang wampwomis wampwompwaur pipa, tu wangketopm num pa. Yiprokgen a angket ale men Suta ti kulngkul kul ti pa, am Isrel pake. Isrel wa wangket Pensamin, Pensamin wa angket ale kulngkul, kul wangket kupm tike. Tu mamikgmamin mansan akupmen pa, tu ak ok Ipru wris ata, wa ake tu awi kin ur kai ok ak manet ur pa kalpis. Kupm a men melnum a arpmen yangkipm yiprokgen a Moses pa, kolpa ti yangkipm titnongket a Moses, a tu mamikgmamin mansan a men pa kupm alupm worwor, atom kupm katnun yek kimeket.

⁶ Arpmen yangkipm titnongket a Moses ti pa, am kupm alkupm wris ti pikekg itna titnongket minsrang tike, atom kupm or tu a ukipma katnun Sisas pa alken wleket unkwanten. Wa tu wrong kin kipman pikekg ari atn a rpma akupmen pa nampokgen yangkipm titnongket a Moses, a tu mamikgmamin mansan amenen pa, ake pikekg tu ur ari kupm ti la kupm ti kai ar ur pa, kalpis. Kupm pikekg katnun yangkipm titnongket pa yek

kimeket.*

⁷ Kweikwei wor wor a wet kupm la a pikekg ak ngkat nang akupmen pa, pa pikekg kupm ari la la pa wor ak angklinsopm. Ari wa kupm ukipma Krai ti, atom kupm ari la kweikwei wor wor a kolpa pa, ake wor, ake antiwe a ak angklinsopm.

⁸ Ake kweikwei wor wor a wet kupm la pa kolti pa, kweikwei wrongkwail ti am kupm ungkwan la, pa paipm, atnen kupm la uwi riwe Krai Sisas, Wailen akupmen pa itna ep wor wrisen angen kweikwei wrongkwail wor wor ai. Kweikwei wrongkwail wor wor pa kupm ungkwan kol ipik palk paipm a angkli pa, eng mpa kupm rkul Krai pa itni titnongket pake.

⁹ Wa eng mpa nikgwalpm akupm ti kai rki wris nimpokgen kil. Pikekg kupm katnun yangkipm titnongket a Moses, a tu mamikgmamin mansan, pa ake wa antokg kupm ti wor itna wulmpa a Maur Wailen pa. Kolpa atom kupm ukipma Krai pa, eng mpa kupm palng ute wor itni wulmpa a Maur Wailen. Kupm ukipma Krai pa, atom Maur Wailen kil alkil pa antokg kupm palng ute wor itna wulmpa alkilen pake.

¹⁰ Kweikwei wrongkwail am kupm uk yirokg ise, eng kupm la riwe Krai eng palng kolen kil, wa kupm la riwe titnongket kol a pikekg kil wrekg

* **3:6 3:6** Pol kil pikekg ari tu a ukipma katnun Sisas pa la pa tu katnun melnum ur kolti, ake Krai a Maur Wailen pikekg yapon yangkipm la ikga ukwa nar pa, palpa ur a wai. Yangkipm titnongket a Moses pa la, kol melnum ur kil ngkat kil alkil la kil Krai pa, mpa ik wesel eng kil imo. Atom Pol kil am pikekg katnun yangkipm titnongket pake. **3:7 3:7** Mat 13:44-46 **3:9 3:9** Rom 3:21-22 **3:10 3:10** Rom 6:3-5; 8:17

a kirkap pa. Wa kupm la rki kalkuten kol a pikekg kil arki pa, kolpa kaingkai imo kol pikekg kil amo pa.

¹¹ Wasrongen a Maur Wailen la kupm wrekg i kirkap pa, kupm ikga wrekg pa.

Wulmpa itni ya kolpa pirng ikoporen tita

¹² Kupm ake akwonalmpen la kupm pirng kai angko wrik a kai elngen pa, a pa, kupm pirng itna pa. Kupm ake lala kupm ti wor ise, kolpa kalpis. Kupm nikgwalpm arkekgen pirng atatu ti pa, eng la uwi KraiS Sisas ti kol kwei ur wor a tu pirng akoporen tita eng la uwi pa, kol a pikekg kil awi kupm ti eng alkilen pa.

¹³ Kipm melnum alkupm a mentepm ukipma KraiS, am aklale pake, ake kupm akwonalmpen la kupm pirng kai palng kai wrik a awi kweikwei wor pa, pa apa. Pake nikgwalpm wris ata a kupm akwonalmpen pa pati, kupm la pirng wulmpa itni ya kolti kai pake, a ake la ikgel yirokg pa.

¹⁴ Ti kupm pirng nikgwalpm arkekgen atatu angko ya a pa, eng la kai ngko wrik a elngen pa, eng la uwi lukglukg wor wor a pikekg Maur Wailen aknamput tu melnum a ukipma KraiS Sisas pa, la ikga tu kaino uwi kaino anong wor alkilen ai.

¹⁵ Mentepm wrongkwail a nikgwalpm amentepm ti pa rka kolen kin nangkwor mel nangkwor pa, mentepm mpa lupm nikgwalpm kol a wet kupm la pa. Tu tiur a alupm nikgwalpm manet pa, ikga Maur Wailen planten nikgwalpm wor alkilen pa, eng mpa tu kutnun.

¹⁶ Mla ur a kil ep aki angko kuin aki katnukg pa, mpa wa ntei. Pake wail manten pa pati, mentepm kimeket mpam kutnun tita or ya wris pa kai pake.

¹⁷ Kipm melnum alkupm a mentepm ukipma Krai, mpa kipm ri atn a rpma akupmen pa, atom kipm kutnun! Wa kipm ri tu tiur a katnun yikak milik a kimpron a pikekg men angkom ore pa, kipm kutnun kitila pawo!

¹⁸ Pikekg kupm lanakepm ep anti watipmen, pake kupm wa lanakepm ak ikgakgel anti ur la, tu waillet pa tu angkom or ya manet, ti tu pa wrongmanto a Krai a pikekg amo rka yo okgmangki.

¹⁹ Tu katnun kuina ur a ipma a tu alntu ti wasrongen la ntokg ti kolti la, pa kol maur wailen atuwen pake. Tu antokg kweikwei a numkropis a uk numpaipm kamel pa tu atopen ngkat nang alntuwen pa la, tu antokg kweikwei a numpwor. Tu nkgwalpm arkekgen kweikwei a itna kanokg a ti kolti, kolpa ti tu pa ikga kai paipm kai wakg.

²⁰ Mentepm ti pati, anong mreren a mentepmen pa kaino kitnong. Mentepm ti nkgwalpm arkekgen rpma nungkwangen Wailen Sisas Krai, melnum a ikga ingkaino kitnong nar ikuwiyo iye kaino.

²¹ Ikg a kil ik titnongket a kil alkil ti ik lok kweikwei wrongkwail pa kai orngwatneikgen kil alkil, a kil itni ep ikglen kweikwei wrongkwail pa. Ikga ik titnongket wris pa, kil ikga ntokg numpalk paipm amentepmen ti kai tukuleikg a

wui numpalk weten wor kol a numpalk klalen wor a kil alkil ai.

4

Pol naki karkurng tu Pilipai

¹ Kolpa ti, kipm melnum a mentepm ukipma Krai, kipm itni titnongket iklale wrisen kutnun Wailen! Yekyek alkupm, kupm ti plan ipma wor wasrongentepm paipm, nkgwalpm arkentepm rka. Kipm pa kol lukglukg wor wor ur a pikekg kupm aken kwap atom kupm pirng la uwi.

² Kupm la kipmekg kin wekg Yuotia ekg Sintike, kipmekg kin a ukipma Wailen Sisas, kolpa ti kipmekg elngen nkgwalpm a kolpa, a kipmekg lok ngkli tita rpmi riwor.

³ Wa kitn Sisikus, melnum alkupm a mentekg arki kalkuten akwap wris, kupm la kitn ngklin kin wekg pa, eng mpa tuwegk rpmi ukipma wor tita! Tuwegk pikekg akwap timplowis angklin-sopm ak wang a kupm laron yangkipm wor a la Krai. Tuwegk pa nampokgen Klemen, wa tu tiur a pikekg men akwap or wris pa, nang atuwen pa ela wrkapm a Maur Wailen nira nang a tu a ikga rpmi wor yongkyong elawe pa.

⁴ Kipm a Wailen pa ti, kipm itopen o! Wa kupm wa la lanikepm nti ur la, kipm itopen ikngklei wang kolpa iye kai o!

⁵ Wailen wreren eng a nar,* ti kipm lok ngkli tita meen tatar rki wor! Kipm ik kolpa, eng mpa ik plan tu wrongkwail ai, eng mpa tu ri.

⁶ Ampur kipm mining paipmen num, ngkark atnen kalkuten ur pa! Pa kipm ukwen Maur Wailen pa oklala nikel, a wa lkel wor, eng mpa kil ngklinsepm kuina ur kalkuten a kipm arki pa.

⁷ Kipm oklala niki Maur Wailen kolpa pa, kil mpa lkepm ipma meen wor a Krai Sis pa rpmi wail ikglen nol nikgwalpm akipmen pa, ti kipm ake mpa ngkirk. Ipma kukula kupuk meen wor a Maur Wailen alkepm kolpa pa kinar kanokg walopmen kinar ai, a wa kaino kwa watin kaino ai, a ariwe a melnum ti ake antiwe ariwe pa.

⁸ Kipm melnum alkupm a mentepm ukipma Sis, oklala akupmen eng a kai plalng pake. Ti kupm la la lupm lupm kipm pa la, nikgwalpm akipm pa rki eng kweikwei a wor, a wa kweikwei a wrongkwail ari kapornng yangkipm la pa wor. Kweikwei a wor pa kol kil: kweikwei a aklale, kweikwei a ute wor, kweikwei a wriwen wor, kweikwei a atopen, a wa kweikwei kol a tu awi wor lawepm! Nikgwalpm a kipm pa rki eng kweikwei a wor wor kolpa kolti!

⁹ Kuina ur a pikekg kupm kaling plantepm atom kipm awi ariwe pa, wa pikekg kipm atning a kupm laron pa, wa ari a kupm antokg pa, am kipm uwi ik kitila kolpa iye kai o! Kolpa pa mpa

4:5 4:5 Ipr 10:25; Sem 5:8-9 * **4:5 4:5** Ok yiprokgen Krik pa la “Wailen wreren” pa pati la “Wailen kil itna wrerento”, wa ur pa la la “Wailen wreren eng a nar.” **4:6 4:6** Mat 6:25-34; Kol 4:2 **4:7 4:7** Aisaia 26:3; Son 14:27; Kol 3:15 **4:9 4:9** Rom 16:20

Maur Wailen ntiwepm rpma lkepm ipma meen wor. Kil pa yan yiprokgen a ipma meen wor pake.

Pol uk wor tu Pilipai a ukipma a angklinsel kweikwei

¹⁰ Kipm pikekg itna lailaien angklinsopm kweikwei ak ai kul pake. Kupm atnuurngkep ti pa, kipm atopen kolpa itna la ngklinsopm, pake ya kalpisen mpa kipm ukwa kweikwei pa kul ik ngklinsopm or kolai. Atom ak wang ti kipm wa wonlan eng wa ukwa kweikwei pa kul ak angklinsopm tike, ti kupm atopen paipm ngkat nang a Wailen.

¹¹ Ake la la pikekg kupm rpma paipm aki tukwok eng okipma a kweikwei a numpalk pa, atom kipm angklinsopm pa, kolpa kalpis. Kupm rpma kolai pa, pa ake paipm. Kupm rpma wor atopen rpma kolti. Wang wor wang paipm pa, kupm am rpma ariwe ise.

¹² Kupm ariwe a kupm rpma antiwe kweikwei, a kupm ariwe a kupm rpma tukwok, pa am kupm rpma ariwe ise. Akangklei wang a kupm rpma ti aki, rpma tatu ai ai pa, nikkalmpopm aki, nikkwor aki, kupm antiwe kweikwei waillet aki, kupm rpma tukwok pa, kupm rpma wor kolti. Ya wrongkwail a kolpa pa am kupm ariwe yat ise.

¹³ Kupm antiwe arki kalkuten, a antokg kweikwei wrongkwail pa ak titnongket a Krai alkopm pa.

¹⁴ Ari kipm ukwa kweikwei pa kul ak angklinsopm ak wang a kupm arki kalkuten, a kupm rpma tukwok kolkil pa wa wor yat.

¹⁵ Ak wang ep a pikekg kupm angkli yangkipm wor a la Kraisa pa ak angklin kipm pa itna anong kanokg Masetonia, wa kupm atnurngkepm kai anong ur ai pa, am kipm melnum a ukipma Maur Wailen kai Pilipai pa ukwa kweikwei pa kul ak angklinsopm pake. Kipm pa ariwe pa, ake wa tu anong manet tiur a ukipma Maur Wailen pa wangkir a yapo nampokgen kupm ti pa, kalpis, am kipm alkipm pa kolti. Kupm pikekg laron yangkipm pa ak angklinsepm, wa kipm wa akalmpa ukwa kweikwei a kupm tukwok pa kul ak angklinsopm.

¹⁶ Wa ak wang a pikekg kupm rpma kai Tesalonaika pa, kupm tukwok eng kuina ur pa, kipm pa pikekg ukwa kweikwei kul ak angklinsopm anti aripm ur pake.

¹⁷ Kupm atopen kweikwei kol a kipm ukwa kul ak angklinsopm, pake wail manten pa kupm wasrongen la kipm ik kolpa iye kai pa, pa kolen kipm ak angkine marpm akipmen a Maur Wailen ikgalen kaino anong wor pa kil anip kolpa aye kaino wail.

¹⁸ Ti kil, ker a pikekg kupm wangket akawiye kweikwei a pikekg kipm uk Epaprotitus ayentopm kul pa, wailat paipm angen ai. Pa kol yaprekg wor a kipm al wor uk Maur Wailen ti kil awi wor atopen pa.

¹⁹ Maur Wailen akupmen, wa kil Maur Wailen akipmen yat, kil antiwe kweikwei wor wor wrongkwail wailat. Kipm melnum a ukipma Kraisa Sisasa pa, kuina ur a kipm tukwok pa, mpa Maur Wailen kil lkepm pa.

²⁰ Kolpa ti mentepm ngkit nang a Maur Wailen, Yan almentepmen pa, ikngklei wang kolpa iye kai! Aklale wrisen.

Pol uk wor tu Pilipai

²¹ Alkepm wor, kipm wrong kin kipman a Maur Wailen a ukipma Krais Sisas, kupm nikgwalpm arkentepm rpma pa! Tu melnum a mentepm ukipma Sisas a antiwopm rka ti pa, wa tu la kupm nirantepm la tu nikgwalpm arkentepm rka pa.

²² Tu kin kipman wrongkwail a Maur Wailen a rka kil pa, wa nampokgen tu a akwap rka wan wail a melnum tukgunakg a Rom kil pa, tu wa la tu nikgwalpm arkentepm rka kolpake.

²³ Yangkipm a kupm Pol nira eng ak angklin-sepm am kai kolpake. Kupm asen Wailen Sisas Krais la kil plantepm ipma wor alkil a ngklin kipm wris wris pa rpma wor.

Kla Weten A Maur Wailen Lam
The New Testament in the main dialect of the Urim
language of Papua New Guinea
Nupela Testamen long tokples Urim long Niugini

copyright © 2024 SIL Papua New Guinea

Language: Urim

Dialect: main

Contributor: Wycliffe Finland and Finnish Evangelical Lutheran Mission

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-12

PDF generated using Haiola and XeLaTeX on 12 Sep 2025 from source files dated 12 Sep 2025

2e27dc3a-67e0-5642-ba90-804f3df7d2c5